

保嬰撮要卷十六

薛氏醫按

吳郡薛 已著

跌仆外傷

傷損之症若色赤腫痛而血出不止者肝心內熱也
用柴胡梔子散色白不痛而血出不止者脾肺氣虛
也用補中益氣湯漫腫不消者元氣虛弱也用五味
異功散黥腫不散者瘀血凝滯也用加味消遙散肌
肉作痛出血多而煩熱者血脫發躁也用獨參湯因
亡血而煩躁不安者營衛俱傷也用八珍湯加柴胡

壯用皮久痛不止者欲作膿也用托裏散以指按腫而復起者膿已成也宜刺洩之膿出而反痛者氣血內虛也用十全大補湯若骨髀接而復脫者肝腎虛弱也用地黃丸如兼餘症當參各門治之

一 小兒傷臂出血作痛面色青赤此因驚而肝火動也先用柴胡清肝散血止痛減次用托裏消毒散患處漸潰又用托裏散而愈後因其母多食膏粱之味又惡寒發熱腫痛色赤悞服敗毒之藥口噤流涎手足竝冷余謂脾胃復傷而虛寒也先用六君子湯加薑桂散劑而元氣漸復又用五味異功散月餘而瘡

口斂愈

一小兒傷指出血過多遂至昏憤口噤手撒時搗此氣虛血脫也用獨參湯數劑而安又用五味異功散及托裏散而愈

一小兒傷足憤腐肉白不斂此脾胃虧損而血氣不能達於患處也先用五味異功散助其胃次用十全大補湯益其營月餘而愈

一小兒傷足內憤成膿食少惡心此脾胃氣虛而成痰也用六君子湯飲食頓進膿亦外泄但體倦晡熱朝用補中益氣湯夕用異功散及間服八珍湯而垂

愈後因飲食失宜發熱患處大潰出膿口噤振顫或
癰瘰流涎余謂胃氣虛肝火內動先用獨參湯四劑
仍如前朝服補中益氣湯夕服五味異功散加柴胡
升麻元氣漸復佐以托裏散而瘡斂

一小兒傷指敷涼藥腫至手背膿出清稀飲食少思
此血氣虛弱故也朝用異功散夕用托裏散膿水漸
稠患處紅活又用八珍湯而愈

一小兒傷膝青腫不消面色痿黃仍欲行氣破血余
謂此因脾氣復傷血滯而不行也不信乃服破血之
劑飲食不進寒熱如瘧余朝用補中益氣湯夕用八

珍湯及葱熨法而愈

一小兒臂傷潰而寒熱用八珍湯漸愈後因飲食所傷吐瀉不止搖頭咬牙此脾氣虛而肝邪內侮也用六君升麻柴胡而安又用十全大補湯六君子湯而愈

一小兒閃足腫痛而肉色不變此陽氣虛弱傷在骨也頻用葱熨法五更用和血定痛丸日間用八珍湯數日後佐以六味地黄丸三月餘而痊

一小兒臂骨出髓接入腫痛發熱用葱熨法及異功散加柴胡續斷骨碎補四劑又用補中益氣湯而痊

一小兒閃足骨痛肉色如故頻用炒葱熨之五更用和血定痛丸日間用四君芎歸數劑後用地黃丸三月餘而瘥蓋腎主骨故用地黃丸以補腎也

一小兒折臂出血過多發躁作渴面目色赤脉洪大而數按之無力此血脫發躁也服當歸補血湯而安遂令正體科續接服接骨丹翌日睡而驚動此血尚虛也蓋血生於氣乃用五味異功散加柴胡升麻當歸而安後手足微搐眉唇微動此血虛而肝火內動也用四君芎歸釣藤鈎柴胡漸愈却用托裏散入珍珠湯而全愈血脫發躁若用四物之類復傷脾氣多致

不救設誤白虎湯其危尤速

一小兒跌傷臂骨出骹翌日接入腫痛發熱不食用
葱熨法其痛卽止又用六君黃芪柴胡桔梗續斷骨
碎補而食進腫消又用補中益氣湯加麥門五味數
劑熱退而愈

一小兒十五歲傷腿內潰針出穢膿虛症悉具用大
補之劑漸愈後因勞動手撒眼閉汗出如雨急炒熱
艾頻熨臍腹及氣海穴更用人參四兩炮附子五錢
作一劑水煎徐徐灌服良久臂能少動再劑眼開而
能言惟氣不接續乃用參芪歸木四味共八兩附子

三錢水煎連進二服氣少復乃減附子又三劑元氣漸復後用獨參湯多服而痊

一女子閃右臂寅卯時發熱作痛余決其膽經血虛而火盛先以四物合小柴胡湯四劑而熱退更以四物湯加香附陳皮白木茯苓各一劑山梔五分苓連甘草各三分二十餘劑腫消而愈

一小兒閃臂腫痛發熱惡寒飲食少思余謂脾胃氣虛而壅腫也朝用補中益氣湯夕用五味異功散間服八珍湯三月形氣漸克而愈

小兒因跌傷脛漫腫作痛肉色如故服破血流氣

之藥反增腹痛以手按之則痛少止余謂此因脾胃
虛弱誤服破血流氣之劑而然非瘀血也未幾患處
腫消色黯飲食不入腹痛尤甚手足厥冷余用人參
兩附子一錢數劑脾胃漸復飲食漸進患處腫痛
肉色變赤蓋始因元氣不足不能運及故腫消而色
黯服藥之後元氣漸克故脛腫而色赤也次用大補
湯托裏散三月餘而愈

一小兒閃臂腫痛面目天白恪服流氣飲之類益加
腫痛余曰此形病俱虛之症也前藥所當深戒者彼
謂腫痛爲氣滯血凝非流氣飲不能疎導經絡非破

血藥不能消散壅逆余言聲牙而前症益甚發熱煩燥始請治余余曰元氣虛憊七惡蜂生雖盧扁亦不能起矣遂歿

一小兒傷臂腫痛內服外敷皆寒涼止痛之藥半載後潰而腫痛余謂此非托裏溫中不能生也不悟確守前藥以致血氣瀝盡而亡

一小兒跌腿青腫所服皆行氣破血之藥後骨髀內潰青腫益深朝寒暮熱余戒之曰此氣血俱虛甚矣非調補脾胃不可不信

一小兒閃腰作痛服流氣等藥外腫不赤余曰此兒

雖經閃肭然亦稟賦腎氣不足而使之者延久益重
恐為不治彼以迂緩視之後果不起

消腫定痛散治跌撲腫痛

無名異

炒

木耳

炒

大黃

炒各五分

右為末蜜水調塗腫處內有瘀血者砭去敷之患
處潰者用當歸膏敷之尤効

經驗方治跌撲瘀血不散腫痛不止或筋骨傷損疼
痛

黃栢

一兩

半夏

五錢

右各另為末用薑汁調塗患處以紙貼之如乾再

用薑汁潤之日易新藥

神効太乙膏治一切瘡疽潰爛

玄參

白芷

當歸

肉桂

赤芍藥

大黃

生地黄

各一兩

右咬咀用麻油四十兩入銅鍋內煎至藥黑濾去
相徐入淨黃丹一斤再煎滴水中心捻軟得中卽成

膏矣

廻陽玉龍膏

又名抑陰散

治跌撲損傷因敷涼藥或人元

氣虛寒腫堅不散貴腐不斂及癰腫肉色不變或

腫而不潰潰而不斂筋攣骨痛一切冷症方見敷

寒涼之藥

乳香定痛散治杖瘡金瘡一切瘡瘍潰爛疼痛方見

作痛不止

猪蹄湯治一切癰疽杖瘡潰爛消腫毒去惡肉潤瘡

白芷

黃芩

當歸

羌活

赤芍藥

露蜂房孔多者佳

生甘草

各五錢

右用猪蹄一隻水四五碗煮熟去油粗取清湯入

前藥煎數沸溫洗隨用膏藥貼之

跌仆內傷

傷損之症若腹中作痛按之痛甚者瘀血在內也用
加味承氣湯下之下後按之仍痛者瘀血未盡也用
加味四物湯調之按之不痛者血氣傷也用四物加
參芪白朮下後發熱胸脇作痛者肝血傷也用四君
加川芎當歸下後惡寒者陽氣虛也用四君加炮乾
薑下後發熱者陰血傷也用四物加參朮牡丹皮下
後寒熱間作者氣血俱傷也用八珍湯加柴胡欲嘔
作嘔者胃氣傷也用六君加當歸半夏有因乘怒跳

躍而胸腹悶痛喜手按摸者肝火傷脾也用四君加
柴胡山梔畏手按摸者肝血內滯也用四物加桃仁
紅花胸脇作痛飲食少思者肝脾氣傷也用四君加
柴胡丹皮若胸腹脹滿飲食不思者脾肝氣滯也用
六君加柴胡枳殼咬牙發搐者肝盛脾虛也用異功
散加川芎山梔釣藤鈞天麻若用風藥則陰血益傷
肝火益盛或飲糖酒則腎水益虛肝火愈熾若用大
黃等藥內傷陰絡反致下血壯實者或成痼疾虛弱
者多致不起凡傷損之症有瘀血停滯於內者雖裸
體亦以手護腹脇蓋畏物觸之而痛也世俗槩以內

傷陰虛腹痛不辨虛實專用破血之劑以速其危其
得不死者亦幸矣

一小兒跌仆腹痛作嘔惡心氣口脉大此飲食停滯
也用保和丸二服吐出酸食惡寒發熱倦怠不食此
脾胃傷也先用六君子湯次補中益氣湯間服而愈
一小兒墜樓良久方甦呻吟不絕目以手護其腹此
內傷瘀血停滯也用當歸導滯散二錢熟酒調下而
呻吟頓止次用四物加柴胡牡丹皮而安
一小兒跌仆瘀血腹痛用導滯散下之瘀血甚多隨
作煩躁面赤作渴欲飲此血脫也用獨參湯而安又

用四君當歸黃芪及五味異功散而愈

一小兒因怒跳躍脇胸作痛或以爲內傷瘀血服大黃之藥純下鮮血其痛益甚按之則痛止此肝脾氣血俱傷也用四君加芎歸四劑而痛止又以異功散加升麻柴胡而飲食進元氣漸復病亦隨愈

一女子因怒搥胸腹痛經行如崩作嘔不食面色青赤兩關脉大而虛此肝經火動脾經血傷也用加味逍遙散二劑血止次用異功散加柴胡升麻而愈後因復怒腹痛作瀉面青此肝木乘脾也用六君柴胡升麻而痊